

## ՀՀ ԳԱՍ ԳԻՏԱԿԱՆ ՀԱՆՐԱՍՆԵՐԸ ՄԻՋԱԶԳԱՅԻՆ ՀԱՐԹԱԿՆԵՐՈՒՄ\*

Գիտատեխնիկական առաջընթացի ներկայիս տեմպերը պարտադրեցին հրատարակիչներին նորովի մոտենալ գիտական ամսագրերի տպագրությանը: Անհրաժեշտ պայման դարձավ թղթային հրատարակություններից անցում կատարել դրանց էլեկտրոնային համարժեքներին: Ձե՞ որ հետազոտողին հետաքրքրում է, թե իր կատարած հետազոտության արդյունքներն որքան արագ հասանելի կդառնան գիտական հանրությանը: Արդյունքում շահում է թե՛ հոգվածի հեղինակը, քանի որ էլեկտրոնային ամսագրերի պարագայում կտրուկ բարձրանում են գիտնականի գիտաչափական ցուցանիշները և հոգվածի տեսանելիության շրջանակը և թե՛ ընթերցողը, քանի որ նրան շատ արագ հասանելի են դառնում իր հետազոտությունների թեմային առնչվող վերջին հրատարակությունները:

Գիտաչափության հիմնադիրներից Դերեկ Փրայսը նկատել է, որ սկսած 1600-ական թվականներից, երբ ի հայտ եկան առաջին գիտական ամսագրերը<sup>1</sup> և գրականությունը, մոտավորապես 15 տարվա պարբերականությամբ դրանց թիվը շարունակ կրկնապատկվում է<sup>2</sup>: Ըստ փաստական տվյալների՝ 2020 թ. դրությամբ աշխարհում առկա են գիտական 46.736 ամսագրեր: Վերջին 10 տարիների ընթացքում ակադեմիական ամսագրերի թիվն աճել է 28,7 %-ով՝ ամեն տարի աճելով միջինը 2,56 %-ով: Ակադեմիական բոլոր ամսագրերի 75 %-ը հրատարակվում է անգլերենով: 2020 թ. հրատարակվել է 35.070 անգլերեն ամսագիր<sup>3</sup>, որոնց թիվը վերջին 10 տարիների ընթացքում աճել է տարեկան միջինը 3,22 %-ով: Դրանց թիվը 2020 թ. ընթացքում նախորդ տարվա համեմատ նվազել է 0,42 %-ով: Գիտական գրականության թողարկման ներկայիս տեմպերը էքսպոնենցիալ (ցուցչային) աճի միտում են ցուցաբերում:

\* Ներկայացվել է 21. I. 2024 թ., ընդունվել է տպագրության 22. III. 2024 թ.:

<sup>1</sup> Առաջին գիտական ամսագիրը՝ “Journal des sçavans”-ը, լույս է տեսել 1665 թ. հունվարի 5-ին Փարիզում: Այս ամսագրի առաջին համարի հրատարակումից 60 օր հետո՝ մարտի 6-ին, Լոնդոնում լույս տեսավ “Philosophical Transactions of the Royal Society” ամսագիրը: Երկու ամսագրերն էլ առ այսօր հրատարակվում են:

<sup>2</sup> Price D. Little Science, Big Science. New York, Columbia University Press. 1963.

<sup>3</sup> Մեծ Բրիտանիան ակադեմիական ամսագրերի ամենամեծ հրատարակողն է, որը կազմում է համաշխարհային արտադրության ավելի քան 12,53 %-ը: 2020 թ. դրությամբ՝ Միացյալ Թագավորությունում տարեկան հրատարակվել է ավելի քան 5.856 ակադեմիական ամսագիր, իսկ Միացյալ Նահանգներում՝ շուրջ 5.712 ակադեմիական ամսագիր, ինչը կազմում է համաշխարհային արտադրության 12,22 %-ը:

Այսպիսով, ավելցուկային գիտական տեղեկատվությունը պարզապես խորացնում է առկա ճգնաժամը և խանգարում գիտնականներին ճիշտ կողմնորոշվել գիտական հրատարակումների գնահատման հարցում:

Գիտատեխնիկական գրականությունն ունի արագ «հնանալու» այժմեականությունը կորցնելու միտում: Հոդվածների արժեզրկման արագությունը տարեկան կազմում է 10–25 %: Եթե գիտնականն անընդհատ չթարմացնի գիտելիքների իր պաշարը, ապա ստիպված կլինի կամ կրկնել ուրիշի մտքերը, կամ էլ հեռանալ գիտական ասպարեզից: Այդ պատճառով էլ նրան անհրաժեշտ է անընդհատ կուտակել նոր գիտելիքներ, որոնց աղբյուրը, բնականաբար, կարող են լինել նաև ոչ թե թերթերն ու գիտահանրամատչելի ամսագրերը, այլ գիտական լուրջ հրապարակումները:

Արձանագրենք, որ գիտական միջազգային խոշոր հրատարակիչները գնային (վճարային) շատ կոշտ քաղաքականություն են վարում իրենց շտեմարաններին բաժանորդագրվելու հարցում. բաժանորդագրության գները տարեցտարի աճում են, ազդեցության բարձր գործոն ունեցող ամսագրերում հոդված հրապարակելը մեծ ծախսեր է պահանջում, որի արդյունքում անցումային և զարգացող երկրների գիտնականների համար բավականին բարդ է դառնում նման ամսագրերում հոդվածներ հրատարակելը<sup>4</sup>:

Այսպիսով, կարող ենք փաստել՝ «տեղեկատվական ճգնաժամն» արտահայտվում է հետևյալ երեք գործոններով.

1. Հակասություն գիտական տվյալների անընդհատ աճի, ընկալման ու մշակման սահմանափակ հնարավորությունների միջև:

2. Գիտական հրատարակություններում օգտակար գիտելիքների հայտնաբերմանը խանգարող ավելցուկային տվյալների առկայությամբ:

3. Հրատարակչական կազմակերպությունների կողմից բաժանորդագրության շատ բարձր գների իրողությունը:

Առաջին երկու գործոնները «մեղմելու» նպատակով գիտական արտադրանքի թողարկման համաշխարհային շուկայում գործում են տարբեր կառույցներ, որոնք մասնագիտացված են գիտաչափական և մատենաչափական տվյալների հավաքման և վաճառքի հարցերով<sup>5</sup>: Որպես կանոն, բոլոր խոշոր հրատարակչական կազմակերպություններն իրենց առևտրային փաթեթներում հիմնականում ներառում են “Web of Science”-ի և “Scopus”-ի կողմից ազդեցության բարձր գործոն ունեցող ամսագրերը: Ռուսաստանում գործում է

<sup>4</sup> Նշենք, որ 2021 թ. ազդեցության բարձր գործոն ունեցող ամսագրում մեկ հոդված տպագրելու արժեքը կազմել է մոտավորապես 3.450 ԱՄՆ դոլար, իսկ նման ամսագրերին բաժանորդագրության գները տարեկան ունեցել են 3–5 տոկոս աճ [տե՛ս St. Bosch, B. Albee and S. Romaine. Are We There Yet? | Periodicals Price Survey 2022, April 14, 2022. – <https://www.Libraryjournal.com/story/Are-We-There-Yet-Periodicals-Price-Survey-2022>; K. Yu p. How Scientific Publishers’ Extreme Fees Put Profit Over Progress, May 31, 2023. – <https://www.thenation.com/article/society/neuroimage-elsevier-editorial-board-journal-profit/> (դիտվել է 21. III. 2024)]:

<sup>5</sup> Գիտաչափական տվյալներ հավաքող համաշխարհային հսկաներից են “Web of Science” և “Scopus” կառույցները:

«Գիտական վկայակոչումների ռուսական ցուցիչը»<sup>6</sup>, իսկ Հայաստանում այդ գործառնությունները կատարում է ՀՀ ԳԱԱ ինֆորմատիկայի և ավտոմատացման պրոբլեմների ինստիտուտի «Գիտական տեղեկատվության վերլուծության և մոնիթորինգի կենտրոնը», որն իր գործունեությունը իրականացնում է հետևյալ ուղղություններով.

ա) Հայաստանի գիտության ոլորտի ուսումնասիրություն և մշտադիտարկում:

բ) Հայաստանում գիտաչափության՝ որպես գիտության առանձին ճյուղի ներդրում և զարգացում:

գ) Հայաստանյան ամսագրերի ազդեցության գործոնի հաշվում:

դ) Գիտական հղման հայկական ցուցիչի ստեղծում:

ե) Գիտության բնագավառում վիճակագրության, գիտական ներուժի հաշվառման, վերլուծության և կանխատեսման մեթոդաբանության մշակում:

Աշխարհում հրատարակչական կազմակերպությունների կողմից բաժանորդագրության շատ բարձր գների առկայությունը լուրջ խոչընդոտ է գիտության զարգացման գործում: Նման «աղաղակող» գների դեմ արդեն սկսել են ընդլվել նաև ամերիկյան համալսարանները և հետազոտական կենտրոնները: Բարձր գների առկայությունը զարգացող և անցումային փուլում գտնվող երկրների պարագայում «տեղեկատվական ստրկության» գործիք է դառնում:

Ի հակադեպ հրատարակչական առևտրային մոդելներին՝ գիտնականների ջանքերով 1990-ական թվականներին սկիզբ առավ «Բաց մատչելիության» շարժումը, որը ենթադրում է անվճար հասանելիություն գիտական հոդվածներին և գրքերին: Նմանատիպ պահոց առաջինը ստեղծվեց Լոս Ալամոսում ամերիկացի ֆիզիկոս Փոլ Գինսպարգի կողմից, որը հայտնի է arXiv.org անվանումով:

ՀՀ գիտությունների ազգային ակադեմիայի բոլոր 29 ամսագրերը այժմ ունեն իրենց էլեկտրոնային համարժեքները, որոնք ազատ դիտման և անվճար ներբեռնման կարգավիճակով հասանելի են ինչպես ԳԱԱ, այնպես էլ Հիմնարար գիտական գրադարանի կայքէջերից: Ամսագրային հրատարակությունների թվայնացման աշխատանքները ԳԱԱ-ում սկսվել են 2008 թ. և կրում են շարունակական բնույթ: Այսօր թվայնացվում են նաև ԳԱԱ-ի կողմից տպագրված գրքերը, որոնք ազատորեն հասանելի են օգտվողներին:

Միջազգային հրատարակիչները հետևում են էլեկտրոնային գիտական ամսագրերի՝ շուկայում առկա զարգացումներին, աշխատում հնարավորինս շատ բարձրարժեք գիտական հրատարակություններ ներառել իրենց առևտրային փաթեթներում: Խոշորագույններից մեկը՝ «EBSCO» հրատարակչությունն է՝ տարեկան 3 միլիարդ դոլար վաճառքի ցուցանիշով, որի միայն «Academic Search Complete» շտեմարանը պարունակում է ավելի քան 8.500 գիտական ամսագիր: Իսկ այդպիսի շտեմարանների քանակը գերազանցում է 400-ը:

<sup>6</sup> Российский индекс научного цитирования (РИНЦ).

<sup>7</sup> arXiv.org-ը 2024 թ. մարտ ամսվա դրությամբ պարունակում է անվճար ընթերցման և ներբեռնման հնարավորությունով մոտ 2.4 միլիոն գիտական հոդվածներ ֆիզիկայի, մաթեմատիկայի, համակարգչային գիտության, քանակական կենսաբանության և էլեկտրատեխնիկայի բնագավառներում:

ՀՀ ԳԱԱ «Քնական գիտություններ» էլեկտրոնային ամսագիրն առաջինն էր, որ 2005 թ. ընդգրկվեց «EBSCO» հիմնական շտեմարան:

2013 թ. սկսած՝ «EBSCO» հրատարակչությունը համագործակցում է ԳԱԱ նախագահության հետ՝ տարբեր շտեմարաններ ներառելով ԳԱԱ-ում հրատարակվող գիտական ամսագրերը:

2013 թ. մարտից «EBSCO» հրատարակչությունը իր «Central & Eastern European Academic Source» շտեմարանում է ներառել ՀՀ ԳԱԱ-ում հրատարակվող «Պատմաբանասիրական հանդես»-ը, ինչպես նաև՝ ակադեմիայում գործող հետևյալ ամսագրերը.

- «Հայաստանի կենսաբանական հանդես»՝ ներառված է «EBSCO»-ի «Academic Search Ultimate» շտեմարանում:

- «Armenian Journal of Mathematics»՝ ներառված է «EBSCO»-ի «Academic Search Ultimate» շտեմարանում:

- «Armenian Journal of Physics»՝ ներառված է «EBSCO»-ի «Academic Search Ultimate» շտեմարանում:

- «ՀՀ ԳԱԱ գեկոլոգներ»՝ ներառված է «EBSCO»-ի «Applied Science & Technology Source Ultimate» շտեմարանում:

- «Հայաստանի ԳԱԱ տեղեկագիր. Մեխանիկա»՝ ներառված է «EBSCO»-ի «Academic Search Ultimate» շտեմարանում:

2024 թ. հունվարից ԳԱԱ «Լրաբեր հասարակական գիտությունների» հանդեսը ևս ներառվեց «EBSCO»-ի «Central & Eastern European Academic Source» շտեմարանում:

Այսպիսով, այս ամսագրերի ներկայացվածությունը նման խոշոր հրատարակչական ընկերության ծառայությունների փաթեթում մեկ անգամ ևս փաստում է Հայկական գիտության բարձր վարկանիշը՝ նպաստելով հետազոտողների տեսանելիության բարձրացմանը: Այն նաև շոշափելի և առաջընթաց քայլ է այդ ամսագրերի համար, որպեսզի մոտ ապագայում ներառվեն «Web of Science» և «Scopus» շտեմարաններում: Այժմ ՀՀ ԳԱԱ հիմնարար գիտական գրադարանը համագործակցում է նաև «Crossref» տեղեկատվական հարթակի հետ, որի արդյունքում ԳԱԱ բոլոր ամսագրերը և գրանցում առկա գիտական ուղղվածության հոդվածները ստանում են թվային օբյեկտի նույնացուցիչ:

ՏԻԳՐԱՆ ԶԱՐԳԱՐՅԱՆ

տ. գ. թ., ՀՀ ԳԱԱ հիմնարար գիտական  
գրադարանի փոխտնօրեն